

惠安縣志卷之二

邑人淨峯張岳維喬

昔在陶唐敷土辨晷表厥鎮望以作邦常維茲遐陬
沈伏弗章精靈髣髴雲雨飛揚興財產利蘇阜庶眚
豈必崇深資化無疆乃稽紀叙爰繼職方志山川潮
汐目凡三

諸山大勢

吾邑之山分三紀皆自德化戴雲山發脉東行至仙
遊白隔嶺又東至大尖小尖二山又東六十里至晉
江吳洋村分一支北行循日曝嶺爲觀音山其北爲

△惠安志卷二

一

程子鸞

塗嶺白水與仙遊隔界東馳以至于海其南至五公
山是爲北紀自吳洋東南行七八里至晉江盧田村
分一支南行循螃蠏嶺至田船報劬山抵洛陽江西
與晉江隔界是爲南紀盧田之東循芹嶺東行至鷄
籠山又東至二髻山又東少北至大帽其南爲雲峰
山循後吳嶺東平卧龍以至螺峯而縣治負之北至
峯崎山東南抵海而止是爲中紀皆原於大帽視南
北二紀延袤最廣

北紀諸山自晉江吳洋嶺分支北行者

觀音山在六都二峯駢連尖整秀麗以其狀肖觀音

故名

靈鷲山又名烏石山在觀音山東

崑崙山在靈鷲山北山勢高聳望之若祥雲然

伏虎巖在崑崙山南上有清泉石室頗幽絕蔡忠惠之母盧氏爲邑人忠惠嘗讀書于此其以伏虎名巖者以爲宋祥符中僧道養隱是巖能馴伏猛虎或出山暮歸虎輒伏山下元泰定庚寅逸人連應玄嘗刻其事于巖石

五公山在靈鷲山南相傳梁有唐公志公寶公化公朗公共隱于此今山石上尚存靈符五道及五公山

一 惠安志卷三

二

程

三字南唐保大中檢校禮部尚書江盈家山之東麓故又名下江山其北麓隆起一丘爲小山

右自觀音山分支東行至烏石山分小支其北爲崑崙山伏虎巖南爲五公山

塗嶺山在觀音山北昔有涂姓者居之兄弟三人既沒而爲神今郡城東湖傍有昭惠廟即其祠宋淳祐間賜額

放生四字
放生四字

圭峯在縣東北海濱元平陽知州盧琦家其下

大聖巖在圭峯北亦濱海巖壑幽勝堪輿家以爲有
大象卷湖之勢

樂嶼在大聖東北海中宋有陳氏者世居之其子孫
明經登科者二人 國朝例遷內地故址尚存

右自觀音山西北分一支爲塗嶺山至九龍岡分
支東行逶迤二十里至海爲圭峯大聖諸山

南紀諸山自晉江盧田分支南行者

沂山在縣西下有芹溪出芹藻最佳又名芹嶺

陳店嶺在沂山南山西有轉運使陳公故址

報劬山在陳店嶺南山形如展誥在叢山下特爲雄

勝唐刑部郎中陳嘏墓父母其下建菴曰報劬有寶
蓋巖天香石牛頭石坐禪臺方磚塔定公塔濟龍潭
又以勢似覆船名覆船山

鶴堂山在報劬山南下瞰洛陽江絕頂巨石高五丈
餘遠望巍然嘗有鶴來巢其上故名下慈恩寺又有
西鶴嶺山其下爲大雲寺

佛通山在鶴堂山南谷口橋之傍未創橋時有陸路
通郡城因泉有佛國之號故名

右自沂山分支南行脊脉相循至佛通山其下爲
洛陽江

中紀諸山自盧田之東循芹嶺至三髻山分支東南行者

三髻山在縣西十七都絕頂上拔起三峯如髮髻然下有仙人橋橫跨兩厓厓深窈莫見其底傍有石類碁盤又有靈湫廣二丈深倍之禱雨多應此山靈秀時出高僧故有山前銑山後琦之語

大帽山在三髻山東北雄峭盤鬱至絕頂忽寬平百餘丈有泉一泓方僅尺許洞深莫測相傳龍從此騰去禱雨多應山產磁石黃精萬年松

雲峯山自大帽之南爲大腹山既斷復起爲雲峯前關士旁有萬歲坡坡上大石高廣四丈餘復有一石上廣下削高丈餘駕其上以芥挺之亦動故曰危石下有無憂巖

東平山在雲峯山南群山連屬有平原三四里故名卧龍山自東平分支二三里盤曲迴復中一峯形如馬鬣故名

螺山即縣治所負之山山形如螺蜥吐肉後知縣趙汝稟又以其有龍蟠鳳舞之勢鑿鳳池濬龍湫溝水以注之又名登龍峯宋崔拱偕二子正則麗則讀書其上相繼登第故名石刻登龍峯三字尚存

龍蟠山自雲峯歷東平之南卧龍山東北山勢委曲如龍蟠于邑之北門

太白峯在十六都一名蓮華峰有石方直如碑碣上刻蔡忠惠大書太白峯三字

登科山在縣治西舊名登高宋盧瞻讀書其上以八行舉故易今名嘉熙間邑令鄭清子書登科山三大字勒于懸厓又名高士峯

鼓樓山一名留山堪輿謂爲縣治之近案

泗洲山在雲峰之東唐咸通間有僧得浮木夜光刻爲佛像立精廬奉之上有天開巖宋熙寧中令吳克

惠安志卷二

五

麥

睹其上菘蘿蒼鬱疑有異境攀緣而上遙望山海歷歷如掌故名天開

大中山在雲峯之西下有大中寺寺額唐宣宗賜柳公權書今廢

右自大帽南行爲雲峯東至泗洲西至大中其中一支由雲峯循後吳嶺東平山至螺山爲縣治其太白龍蟠登第皆自東平分支環拱縣治之左右者

盤龍山在雲峰之西分支西南行至接待嶺復起七峯重疊而來其勢盤曲故名唐武威節度使王潮墓

在焉下有寂光寺

馬山在二十都勢如馬飲泉又若眠牛故左曰牛坑右曰馬坂

城山在縣南二十八都與文筆山相接如連城故名文筆山在二十九都舊名香爐山三石錯峙旁象鳥耳中堆突如藝香狀人後更積石兩耳之間而剡其上爲文筆

九峯山在文筆之南群峰爭雄若獸而蹲若螺而盤若人而拱若翼而翔若俯而伏或斷或續或向或背其數有九故謂九峰下有九峰院址

松洋洞北接九峰洞僅容一人側入其中廓然容二三百人洞門石罅有老藤直垂三丈餘入者縋以下不枯亦不萌

美女峯在二十五都舊名靈秀山唐工部侍郎黃訥裕祖墳在此後其姪女爲閩王審知妃堪輿家以爲此山之應

錦田山在美女峯東下有田萬頃五代漳州刺史張清溪居此衣錦還鄉號其山爲錦田溪爲錦溪工部侍郎黃訥裕亦家焉裔孫多擢第者前坡夜現光采因建葆光堂取莊子之語名之

白雲巖在美女峯西昔有高人道淵誅茅結屋白雲常覆其頂巖前雙石夾道其左者扣之特有磬聲清水巖在二十一都山石相撐持自成室列坐數人扣之空窅通答鏗然有聲絕頂有泉一泓澄澈不涸故名

青山在縣南僞閩時將軍張相嘗立寨于此以禦海寇既沒鄉人廟而祠之至今不廢

岱嶼在縣南大海中舟楫必經之地常有戈船守之獺窟山在縣南海中

大岞山在大海中山頂有洞由小石門入丈餘折而

右轉巨石如屏可蔽內外中容數百人一人持戟守門千百人攻之不入洪武間倭寇作梗居人避之于此寇不能攻乃去山多恠石有如鐘磬者扣之聲聞數里

右自盤龍分支南行復折而東其山麓皆參差南出至海而窮南至于獺窟東南至于大岞

靈瑞山自城山分支北行十餘里爲是山自縣治望之如屏幃然上有靈瑞巖遺址山之東麓窪坎尺許停蓄清水涸之泉脉輒湧出曰龍泉其北爲員常院院東北麓大石上石痕濃淡隱隱成山字甚恠偉可

喜

峰崎山在靈瑞之北十里堪輿家以爲縣之水口山
輞川山在峰崎之北三里居民數千家

香山在靈瑞之東二十里宋乾道中里人吳德彰年
幼父母沒于外不能歸葬及長刻檀木肖像葬于山
阿香氣久之始散故名其南爲獅山

淨山一名尖山圓淨尖秀下瞰東溟山上多怪石如
水齧射狀最高而峭拔者三可登以觀日出傍有石
竇或云其中洞深可居今堙廢山產紅丹石

小岞山在淨山東十里宋參知政事李文會祖居此

△惠安志卷三

八

王

其壻名蝸螺上水者尚存黃崎在其北大岞在其南
凡邑諸山之東趨于海至此三山而止又東則爲東
溟之水通海外諸夷

黃崎山在香山北十里環三面皆海鹵氣吹盪不生
草木宋時產鐵鑛嘗置爐于此煮煉今廢又名揚旗
山爲其勢似之

右自城山分支北行至靈瑞復分爲二北止於輞
川東止於小岞東北止於黃崎與圭峰對峙海門
凡邑諸水由峰崎添崎二港入海者皆滙于此

論曰余嘗登龍山絕頂環望邑中諸山自西北大帽

麓別支分迤邐將窮則環以鉅海精氣停洩為雲雨
為草木為庶品其最奇秀者為人物嗚呼此造化之
紀也邑無小必有崇山鉅川以奠地守彼徒探幽討
勝斬於一賞者又烏覩所謂山川者乎

諸水大勢

邑諸水悉自西北發源循山勢東南由澗入溪由溪
入埭由埭入港由港入海其入海所匯之港正北曰
傳埭東北曰添奇港正東曰峰崎港東南曰前林港
正南曰馬山埭西南曰洛陽港其北紀諸山之水循
塗嶺北麓至白水小溪東流者則入傳埭其出塗嶺

觀音二山之間循山勢東流又轉而南者則入添奇
港南紀諸水出三髻山前南流至谷口橋者則入洛
陽港惟中紀諸水最多其出大帽山後為菱溪為驛
坂溪皆東南會流入峰崎港其出縣左右山谷間則
皆東北流以入峰崎港又一支循城山文筆而東者
則入前林港凡山之所趨則必有水以循其脉絡山
之窮處乃水之所會故大勢可得而見云

北紀之水

西充溪其源有二一出小鼓溪一出小溪合流過白
水橋入傳埭

證果東溪發源塗嶺北山谷間東南流過橫山橋至下盧溪

真如溪自橫溪發源東南流過店尾橋匯為潭至下盧與證果東溪合東至龍田又南至古縣過際頭橋入添崎港

南紀之水

白巖溪其源有三一出三髻山前為沙溪一出胡坑為前郭溪一出晉江柯山嶺為灣溪並會于沙溪過谷口橋入洛陽港

中紀之水

△惠安志卷二

十

謝裕

驛坂溪發源大帽東麓過驛坂橋至于埔頭溪

菱溪發源觀音山後懸鐘嶺折而東南流過菱溪橋至埔頭與驛坂溪會入峰崎港

茭布溪發源雲峰山東流過居仁舖橋至前灣又一溪發源五峯巖過泗洲橋亦至前灣與茭布會入峰崎港

龍津溪發源東平山經蓮華山下至龍津陂繞縣治前樓山之陰達下謝溪入王孫走馬埭

南坑溪其源有二一自縣西馬壠發源東流至周旁口過陳公橋一自寂光溪發源至下林溪合流至通

濟橋北至進士橋又北至走馬埭入峰崎港

宣妙溪發源城山北至下梁堰爲埭東至柯埭橋又東至前灣溪

金山溪發源九峯山下循文筆東麓至金山宮又東北流至前灣與宣妙溪合東至東井埭

下曾溪發源有二一出上曾溪過上田小橋一出上范溪過上田大橋會于充口溪入馬山埭

黃坑溪發源鶴嶺坑出過九斗坵入馬山埭

論曰吾邑北有楓亭溪南有洛陽江合山谷諸水受之以獨趨於海山之出兩水之間爲邑境壤亦將至

海而窮矣而直十數里內洄洑堪巖稍緣山麓以行其源流遠近可知也然其流惡鍾美潤槁生物與人事相因爲用則邑之農田蓋資之而不可以泯沒者故各本其脉絡著之

潮汐

北自樂嶼南屬之岱嶼並海墻百餘里西循鳳山抵馬山達洛陽江皆有支海穿達岸麓潮汐出入其中能盪滌氛瘴通利舟楫漁鹽業作以爲生者亦有版籍征稅領在有司然多小小洲港不可勝記姑記其水道經流之大者

東北一支由黃崎入北至埧頭港南至輞川灣其南
為張坑後海灣延袤三十餘里凡諸溪水之入添崎
峰崎二港者皆歸之

正東一支由小岞大岞二山之間入至前林港凡諸
溪水之入東井埭者皆歸之

東南一支由岱嶼入西至鳳山又西至白崎又西至
馬山凡諸溪水之入洛陽江者皆歸之

候潮之法以太陰每日所躔天盤子午卯酉之位而
定其消長月臨於午則為長之極歷未及申酉則消
消極復長以至於子又為長之極自是至卯而消復

至於午而極盛此其大較也然月順天右行積三十
日始一周天每日臨子午卯酉四位時有先後故潮
因之亦有晝夜蚤暮之不同云

初一初二十六十七潮至在巳亥二時

初三初四初五十八十九二十潮至在子午二時

初六二十一潮至在未丑二時

初七初八初九初十二二十三二十四二十五
潮至在申寅二時

十一十二二十六二十七潮至在卯酉二時

十三十四十五二十八二十九三十潮至在辰戌二時

右分爲六節應月消長月行雖有常度大率朔望前後則行疾至上下弦則行稍緩月行疾則度盈而潮盛月行緩則度縮而潮微水陰氣月爲陰之毋其相應如此

論曰古稱善富國者爲能擅山海之業通漁鹽之利也余嘗東臨海門觀漁人所操諸網技極其纖備南循徼海鹵地場圍蓋纍纍焉可謂無遺利矣歲稍不登則漁鹽之民輒先病何也豈所謂厚生足用者將不在是歟不然則必有授之病者矣利不在民雖多奚益可不審哉